



Aqqalu C. Jerimiassen  
Atassut

UPA 2026/138-1  
09. juni 2026

**Nunatsinni saammaasseqatigiinneq anguniarlugu suliaqartoqarnissaa siunertaralugu Naalackersuisut saammaasseqatigiinnermut aningaasaateqarfimmik pilersitseqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq, Nivi rosing, Inuit Ataqtigiit)

Siullermik Atassummiit Inatsisartut ilaasortaq Nivi Rosing qutsavigerusupparput pingaarutilimmik ullunilu makkunani naleqquttumik siunnersuuteqarmat.

Saammaasseqatigiinnermut isumalioqatigiissitat sulillutik aallarteqqaaramik isornartorsiorneqartaqaaq. Ilaasa suliaq pisariaqanngitsut aningaasartuutaannaasutullu isiginikuaat. Ullumikkulli takusinnaavarput ataatsimiititaliaq pingaarutilinnik innersuussuteqartoq aammalu inuiaqatigiinni suli pisariaqartinneqartunik siunnerfiliisimasoq.

Saammaasseqatigiinneq Nunatta Danmarkillu akornanni pissutsinut kisimi tunganggilaq. Isumalioqatigiissitap aamma ersersippaa pisariaqartoq paaseqatigiinnerup nukittorsarneqarnissaa kinguaariit akornanni, Nunap immikkoortuini assigiinngitsuni, illoqarfiit inoqarfiillu minnerit akornanni aammalu oqaatsit kulturiillu assigiinngitsut akornanni.

Taamaattumik Atassut isumaqarpoq saammaasseqatigiinnermut suliaq suli pingaaruteqartoq.

Naalackersuisut siunnersuummut tapersiinerat nuannaarutigalugu maluginiarparput. Peqatigitilluguli neriuutigaarput innersuussutit pingajuat kisiat killingalugu uniffigineqassanngitsoq, Saammaasseqatigiinnermut isumalioqatigiissitap innersuussutai allat aamma ingerlaavartumik malitseqartinneqassasut.

Atassutip pitsaasutut isigaa ullumikkut Nunatta Danmarkillu akornanni oqaluttuarisaanikkut pissutsit pillugit oqaloqatigiinnissamut ammanerulertoqarnikuunera. Taamaattumik Naalackersuisut danskit naalackersuisuinik oqaloqateqarnertik ingerlateqqittariaqarpaat, tamanna pisariaqartinneqartillugu.

Siulitta oqaluttuarisaanerat paasisariaqarparput, ullumikkut akisussaaffik tigusariaqarparput aammalu siunissaq pitsaanagerusoq ataatsimoorluta sulissutigisariaqarparput.

Ajoraluartumik ukiuni makkunani inuiaqatigiinni oqallinneq sakkortusiartuinnarpoq. Inuit allaanerusunik isummorsorlutik saqqummiisut ilaatigut nipangersarneqartarput imaluunniit naqissusersorneqarlutik. Tamanna imminermini takutippaa saammaasseqatigiinnerup suli qanoq



pisariaqartiginera, oqaluttuarisaanermut kisimi tunnganngilaq, ullutsinni immitsinnut qanoq ileqqulersorfigisarnitsinnut aamma attuumassuteqarpoq.

Atassut isumaqarpoq inuiaqatigiinnik nukittuumik pilersitsisoqarsinnaasoq ataqpeqatigiinnik, akisussaassuseqarnikkut aammalu ataatsimoornikkut. Immitsinnut akeqqersorfiginata oqaloqatigiikkaangatta aatsaat siuariartortarpugut.

Taamaattumik Atassummiit aalajangiiffigisassatut siunnersuut taperserparput aammalu akuerineqarnissaa inassutigalugu.

Qujanaq.